

এইচএসসি পরীক্ষার তারিখ ঘোষণা, রুটিন প্রকাশ

সংবাদ অনলাইন নিজস্ব বার্তা পরিবেশক

: বৃহস্পতিবার, ০৮ জুন ২০২৩



চলতি বছরের উচ্চ মাধ্যমিক সার্টিফিকেট (এইচএসসি) পরীক্ষার তারিখ ঘোষণা করা হয়েছে। আগামী ১৭ আগস্ট পরীক্ষা শুরু হয়ে চলবে ২৫ সেপ্টেম্বর পর্যন্ত। এরইমধ্যে পরীক্ষার রুটিনও প্রকাশ করা হয়েছে।

বৃহস্পতিবার (৮ জুন) ঢাকা শিক্ষা বোর্ডের পরীক্ষা নিয়ন্ত্রক অধ্যাপক মো. আবুল বাশার স্বাক্ষরিত এক সংবাদ বিজ্ঞপ্তিতে এ তথ্য জানা যায়।

শিক্ষাবোর্ডের পরীক্ষা নিয়ন্ত্রক অফিস সূত্রে জানা যায়, কয়েক বছর ধরে প্র্যাকটিস শুরু হয়েছে, পাবলিক পরীক্ষাগুলো সাধারণত রোববার অথবা বৃহস্পতিবার শুরু হয়। সে হিসেবে ১৭ আগস্ট বৃহস্পতিবার এইচএসসি পরীক্ষা শুরুর প্রস্তাব করা হয়েছে। একই তারিখে সাধারণ ৯টি শিক্ষাবোর্ডের পাশাপাশি মাদ্রাসা ও কারিগরি বোর্ডের পরীক্ষাও শুরু হবে।

সূত্রে আরও জানা যায়, ২০১০ সাল থেকে প্রতিবছর ফেব্রুয়ারির প্রথম সপ্তাহে এসএসসি ও এপ্রিলের প্রথম সপ্তাহে এইচএসসি পরীক্ষা শুরু হয়ে থাকে। কিন্তু করোনাভাইরাসের কারণে এ সময়সূচিতে পরিবর্তন আসে ২০২০ সালে। ২০২১ সালে এইচএসসি পরীক্ষা শুরু হয় ২ ডিসেম্বর এবং ২০২২ সালের পরীক্ষা শুরু হয় ৬ নভেম্বর।

রুটিনে পিছিয়ে যাওয়া এই পরীক্ষা ধীরে ধীরে এগিয়ে আনার পরিকল্পনা হাতে নেয় শিক্ষা মন্ত্রণালয়। সিদ্ধান্ত হয় ২০২৩ সালের পরীক্ষা জুলাই মাসের মাঝামাঝি সময় নেওয়া হবে। কিন্তু কলেজগুলো সিলেবাস শেষ করতে না পারায় এই পরীক্ষা এক মাস পিছিয়ে এখন আগস্টের মাঝামাঝি নেওয়া হবে বলে জানান বোর্ড কর্মকর্তারা।

২০২৩ সালের এইচএসসি ও সমমান পরীক্ষা জাতীয় শিক্ষাক্রম ও পাঠ্যপুস্তক বোর্ডের (এনসিটিবি) ২০২২ সালের পুনর্বিন্যাস করা পাঠ্যসূচি অনুযায়ী সব বিষয়ে অনুষ্ঠিত হবে।